

Tin ley pero autoridad no ta actua debidamente

Sentencia di Corte ta crea free for all riba beach cu huurmento di parasol y stoel

ORANJESTAD – Bon Dia Aruba a publica e sentencia di Corte den e caso **LAR** cu **Radisson** a perde contra **Gobierno**. Tabata interesante pa lesa e evaluacion di Corte cu ta muestra claramente cu tin leyman cu ta prohibi ponemento di parasol y stoelnan ariba beach. Tambe tin ley cu ta muestra cu e beach ta un luga publico caminda tur hende por haci uzo di e palapa y parasol cu ta riba e beach.

Sinembargo ta parce cu e accionnan pa mantene e ley no ta keda aplica manera mester ta. A pesar cu ley ta papia cu por actua contra e companianan di watersport, toch esaki no ta sosodiendo debidamente. E ley no solamente mester wordo aplica contra e companianan di watersport sino tambe pa e hotelnan cu no ta atene nan mes na e permiso cu nan tin.

Turismo ta e pilar cu economia di Aruba y ta parce cu

tur hende kier come for di cada pida garnachi di e bolo. Ta straño cu diferente biaha companianan di watersport ta haya boet pa ta viola ley, pero ningun momento ta bay over na tuma medidanan mas drastico. Ta e tolerancia aki ta creando un free for all ariba beach y mester actua pa evita cu e situacion riba beach ta bay for di man.

Den pasado tabatin bastante problema riba e asunto aki caminda constantemente tabatin actuacion di Polis y a bira cu mester tin permiso. Tin algun compania tin permiso pero otronan no tin y toch tin huurmento di parasol y stoel ta tumando luga. Si realmente kier tin control mester actua mas severo. Corte di Husticia den su sentencia a muestra cu pasobra cu e hotel **Radisson** tambe lo ta uzando un parti cu no ta cay den su tereno, no por bay actua contra e companianan.

Lo tabata mas na su luga pa



a tuma medida contra tur pa asina crea un maneho sano. Si e hotel ta viola su permiso, mester actua contra dje y si e companianan di watersport ta viola ley mester actua contra nan tambe. Ta asina ta e unico manera cu por crea un situacion sano.

Con cu mir'e, turista y nos hendenan ta bay beach pa pasa ratonan agradabel. E no mester bira manera un sorto di competencia, caminda companianan ta marca un parti pa nan uzo. Esey tambe segun ley ta malo, pues mester actua tambe contra esey.

E sentencia a mas bien crea un free for all ariba beach en bes di duna guia kico mester sosode.

E ley t'ey bon cla y lo tabata na su luga pa Corte a impone e ley y muestra tur esunnan envolvi cu mester cumpli cu ley. □